



IROMAG

Izdanje za odlazne studente



U OVOM BROJU

VIRTUALNA KANCELARIJA

ISKUSTVA SA RAZMJENE

STUDENTSKI AKTIVIZAM

10 godina BESTa

STUDIJ FARMACIJA

MEĐUNARODNI DAN OBRAZOVANJA

VIRTUALNA KANCELARIJA

by IROUNMO

Virtualna kancelarija je osmišljena da pomogne svima onima koji žele da se informišu o mobilnosti a nisu u mogućnosti da dođu u Kancelariju za međunarodnu saradnju. Aplikacija Gather Town je softver za web-konferencije sa mogućnošću gledanja virtualne "sobe" u kojoj se učesnici nalaze, te mogućnost kretanja i interakcije s drugim sudionicima na temelju lokacija u prostoriji. Studenti će se moći prijaviti putem linka za prijavu koji se nalazi na web stranici: www.iro.unmo.ba. Link će biti podjeljen i putem instagram profila Kancelarije za međunarodnu saradnju.

Iskustva sa razmjene

By IROUNMO

Emina Handžić

Zovem se Emina Handžić i studentica sam treće godine Fakulteta informacijskih tehnologija. Ovaj semestar pružena mi je prilika da odem na studentsku razmjenu u španski gradić Lleidu. Svakim danom sam sve više oduševljena raznolikošću kultura i jezika u ovom univerzitetskom gradu. Kako se Španci ne snalaze najbolje sa engleskim jezikom, nisam imala drugu opciju nego da učim španski, što se iz dana u dan pokazuje kao veoma zabavno iskustvo. Svi imaju mnogo razumijevanja i strpljenja za moje "pokušaje" španskog jezika. Imala sam priliku da upoznam mnogo novih mjesta i probam jela iz svih dijelova svijeta. Kada studenti odu na razmjenu često kažu da im je to bio najbolji period života, što se vrlo brzo pokaže kao istina. Već sada sam počela razmišljati šta bih mogla izabratiti kao destinaciju za narednu razmjenu. I na kraju, nisam sigurna šta me očekuje naredna dva mjeseca, ali radujem se svim novim iskustvima i izazovima s kojim se mogu sresti.



Emin Muzaferija

Možeš li se ukratko predstaviti?

Moje ime je Muzaferija Emin. Dolazim iz Visokog, Bosna i Hercegovina i imam 22 godine.

Zašto si odlučio baš za Fakultet informacijskih tehnologija?

Razlog zbog kojeg sam se odlučio za Fakultet informacijskih tehnologija je taj što je to spektar koji obuhvata tehnološko znanje koje nam je danas itekako potrebno zbog razvoja i napredovanja tehnologije koja je postala naša svakodnevница.

Koja je najbolja stvar koju ti razmjena može ponuditi? Kako bi ohrabrio studente da iskoriste svoju mogućnost razmjene?

Zbog želje za znanjem i upoznavanjem novih ljudi i iskustava sam se i prijavio za razmjenu studenata jer smatram da se tako najbolje šire naši vidici i stvara bolja perspektiva života. Tako da svi studenti koji se osjećaju kao ja i imaju želju da se pomjere iz začaranog kruga bi preporučio da se prijave na razmjenu.



By IROUNMO

Adna Šantić

U nastavku se obraćam tebi. Tebi koji/a razmišljaš da se prijaviš za razmjenu. Mogla bih te nagovarati pišući o gradovima koje ćeš vidjeti, o ljudima koje ćeš upoznati, o pričama koje ćeš doživjeti, o univerzitetu i gradu koji će postati tvojim. To ti sve mogu opisati tako što kažem da će biti nestvarno lijepo. Ludo ćeš se zabaviti i neko će te finansirati da se ludo zabaviš. Ovo si mogao/la pročitati u svakom tekstu koji te poziva da iskoristiš priliku za razmjenu, sa zaključkom kako je to iskustvo koje mijenja život. I to je istina, ali zbog sljedećeg.

To je prilika da isprobаш život. Sam/a i daleko. Kao prvi dječiji koraci, koji moraju biti pomognuti roditeljskom rukom. Ovdje je ta ruka naša Mirsada i koordinatori tvog domaćina univerziteta. Od svih njih dobiti ćeš upute, podršku, odgovore na pitanja, novac i sve potrebno da uspiješ. Onda će ti se taj novi život događati svakog dana. Svaka tvoja akcija imat će i rezultat i posljedicu. Imati ćeš i riješiti stotine problema. Biće grešaka, sa ljudima, sa jezikom, sa nastavom, sa administracijom. Svaka će biti samo tvoja, i svaka popravka iste biće samo na tebi.

Osjetit ćeš nevjerojatnu snagu i ponos svaki put kad je popraviš. Jer ćeš uvijek naposljetku shvatiti da si uspio, i da si prešao/la još jedan level te igrice.

Na tom putu upoznati ćeš sebe. Pritom ne mislim na ono upoznavanje koje je rezultat oduševljenja kad prvi put vidiš neku metropolu, pa ti se upije prvo u oči, zatim u dušu. Pa tamo ostavi trag, tog momenta, vječnu glad i odluku da ih još stotine želiš vidjeti.



Ne, ne mislim na taj divni osjećaj koji ti garantujem da ćeš imati. Mislim na to da ćeš upoznati sve svoje mane. Prvi se put jasno vidjeti, oštro podijeliti svoje sposobnosti i nedostatke. Sve će ih to iskustvo staviti na probu. Upoznati ćeš tačno svoje granice, znati ćeš koliko možeš postići, i ono najbitnije na čemu kod sebe moraš raditi.

Nemoj se bojati, sve će to biti pozitivni ishodi. Samo to što si se usudio/la, odvažio/la, već je dovoljno da ti garantujem sreću na kraju. Ne postoji broj lijepih stvari, iskustava koje ćeš doživjeti, niti ih možeš zamisliti sada, vjeruj mi. Oni će te voditi da ni ne primjetiš koliko bitnu stvar radiš za sebe, za sebe koji/a ćeš tek postati.

Zato se prijavi. Spakuj se i pozdravi sa tom osobom. Vratiti će se toliko poboljšana.

Moje Erasmus iskustvo bilo je u vremenu pandemije, u Italiji, najpogođenijoj zemlji u Europi. U takvim uslovima, i novoj situaciji za mene i sve oko mene doživjela sam pregršt lijepih stvari, nezaboravno iskustvo i ogromnu lekciju. Dakle, neko ko je svoj Erasmus živio u vrijeme pandemije govorи tebi da ne propustiš odživjeti svoj. Vjeruj mi da vrijedi.

STUDENTSKI AKTIVIZAM

10 godina BESTa

By IROUNMO

Povodom 10.godišnjice BESTa Mostar, odlučili smo da napravimo kratki intervju sa predsjednicom Tehničkog kluba Univerziteta "Džemal Bijedić"-BEST Mostar.

1. Možete li se ukratko predstaviti?

Ja sam Aida Zuhrić, predsjednica Tehničkog kluba Univerziteta "Džemal Bijedić" - BEST Mostar. Ujedno sam i studentica druge godine na Fakultetu informacijskih tehnologija, imam 20 godina i živim u Mostaru.



2. Koji je primarni cilj BEST-a?

Primarni cilj, misija i vizija BEST-a jeste razvijati studente tako da postanu najbolje verzije sebe njegujući BEST vrijednosti koje su: Learning, Improvement, Flexibility, Friendship i Fun. Također za cilj imamo da podignemo svijest o različitim kulturama u cijeloj Europi zajedno sa ostalim Lokalnim BEST Grupama.

3. Koliko članova trenutno broji Vaš tim?

Trenutno brojimo 59 aktivnih članova i 42 alumna (počasna) člana sa 14 članova koji su uključeni u internacionalne projekte i timove.



By IROUNMO

4. Ko se sve može pridružiti i na koji način?

BEST-u Mostar mogu se pridružiti svi studenti svih fakulteta i studija Univerziteta "Džemal Bijedić" sa dodiplomskog i diplomskog studija.

5. Koji je vaš najuspješniji projekat?

Najuspješniji projekat koji je naša organizacija iznijela jeste BEST kurs (eksterni akademski seminar) 2018. godine: "Enter the world of Data Science".

To je jedan u nizu od mnogih seminara koje smo organizovali od dana osnivanja BEST-a Mostar. Trajao je 10 dana i učestvovalo je 10 lokalnih i 22 stranih studenata.



6. Koji su vaši sljedeći planovi?

Na proljeće imamo dva velika projekta: Hackathon i BEST kurs.

Hackathon će se, kao i prošle godine, održati online na nivou cijele države, u martu, za sve srednjoškolce završnih godina i studente. U toku je anketiranje studenata i srednjoškolaca kako bismo saznali koje teme su njima zanimljive i o čemu oni žele da uče. Kurs imena "Assure your Quality" će se održati od 9. do 18. maja i moći će učestvovati i strani i lokalni studenti.

Organizacija oba projekta je već počela i organizacioni timovi svaki dan vrijedno rade na njima.

7. Imate li kakvu poruku za studente?

"Nemojte nikada prestati raditi na sebi, učiti nove stvari, razvijati se i akademski i lično i nikada se ne zadovoljavajte minimumom. Vi ste ti koji oblikujete svoju životnu stazu i zbog toga pomjerajte svoje granice i ne zadržavajte se u komfor zoni."

Studij Farmacije

By IROUNMO

Studij farmacije je multidisciplinaran, uključuje temeljne, biomedicinske i stručne predmete kojima se postiže stjecanje specifičnih znanja i vještina iz polja farmacije. Iz temeljnih, biomedicinskih i specifičnih stručnih predmeta stječe znanja i vještine potrebne u istraživanju i razvoju te primjeni lijekova, vještine i iz područja organizacije rada laboratorija, automatizacije, elektroničke obrade podataka, te informatizacije laboratorijskog sistema.

Studij je osmišljen tako da budući diplomirani studenti usvoje adekvatna znanja i kompetencije za rad sa lijekovima u javnim, privatnim i bolničkim apotekama, rad u farmaceutskoj industriji, biohemiskim laboratorijima, u istraživačkim, proizvodnotehnološkim i kontrolno-analitičkim laboratorijima, marketingu lijekova, registraciji lijekova, agencijama za lijekove, zavodima za kontrolu lijekova, te u drugim ustanovama javnog zdravstva i privatnim zdravstvenim institucijama koje će im obezbijediti zapošljavanje na različitim poljima farmacije i kliničke biohemije.

Pravo upisa u prvu godinu na studij Farmacija Univerziteta "Džemal Bijedić" u Mostaru imaju svi državlјani Bosne i Hercegovine i strani državlјani koji su završili srednjoškolsko obrazovanje u trajanju od četiri godine.

Studij Farmacije u trajanju od pet godina u skladu je sa Malteškom konvencijom što garantuje diplomu priznatu u EU. Završetkom studija stiće se zvanje Magistra farmacije.



Međunarodni dan obrazovanja

By IROUNMO



Međunarodni dan obrazovanja obilježava se širom svijeta pod pokroviteljstvom UNESCO-a. Odlukom Ujedinjenih Naroda 24. januar se obilježava kao Međunarodni dan obrazovanja, u znak jačanja uloge koju obrazovanje ima za uspostavljanje globalnog mira, razvoja i napretka. Svrha obilježavanja obrazovanja na međunarodnom nivou je usmjeravanje pažnje vladama i narodima na dostupnost obrazovanja kao načina borbe protiv siromaštva. 24. januar nas podsjeća, ohrabruje i budi nadu da je obrazovanje jedina garancija razvoja i prosperiteta jednog društva. Potreban je angažman društva u cjelini kako bi obrazovanje postalo postalo dostupna svima. Obrazovanje nije privilegija bogatih, niti to smije postati. Obrazovanje nema boju, niti poznaje granice i ono ne smije postati izgovor za diskriminaciju. Obrazovanje se zasniva na vrijednostima i ne možemo govoriti o odgoju i obrazovanju bez vrijednosti.

MOŽDA NISTE ZNALI

- **Didaskaleinofobija** je neobjašnjiv i ekstreman strah od odlaska u školu. Ipak ne preporučuje se njegovo zloupotrebljavanje, pogotovo pred roditeljima i profesorima kako ne bi došlo do zanemarivanja i neizvršavanja školskih obaveza.
- Najstariji univerzitet na svijetu je Univerzitet Al - Karaouine, koje se nalazi u marokanskom gradu Fesu. Osnovan je davne 859. godine.
- Običnom grafitnom drvenom olovkom je moguće prosječno napisati 45 hiljada riječi ili povući vodoravnu liniju dugu 56 kilometara.
- Najveća škola na svijetu po broju učenika je City Montessori u Lucknowu u Indiji. Osnovao ju je 1959. godine Mahatma Ghandi, a školu pohađa oko 32 hiljade učenika.



IROMAG



/iro.unmo



@iro.unmo



/iro.unmo

IROMAG TEAM:

MIRSADA BEHRAM
LEJLA ŠKALJIĆ,
LEJLA REPEŠA
HUSEIN MARIĆ
AMNA MEHIĆ

